

Gvangjsih Minzcuz Bau

ganhhau: CN45-0036 B.2013 Nd.8 Ng.14 liggaeuq gveiqceih nienz ndwencaet cobet

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3086期

Denzyangz: Aeu Doenghyiengh Bouxcuengh Cauxlaeb "Aen Singz Suenva"

田阳:以壮族特色为元素创建“园林城市”

Gaenh bi daeuj, Denzyangz Yen aeu laebguh "aen singz suenva Gvangjsih" guh fuengyiengq, aeu laebguh aen singz suenva faex va lai youh miz daegsaek mbanj Bouxcuengh haenx guh muzbyauh, gyadaih ligdoh gensez nem gaijguh yienhsingz faex va.

Saedhengz aen gunghcwngz youq ndaw singz ndaem faex va gyahaeuj doenghyiengh Bouxcuengh haenx. Denzyangz Yen gungh roengz 3000 lai fanh maenz youq ndaw singz ndaem faex va, guhsat hong bien cienhangh gveihva youq yienhsingz cienzmienh ndaem faex va haenx, youq Baeuq-

roxdoh Vwnzva Gvangjangz, Huzmakgaivaiz, Saeceij Gim Gvangj-cangz, Gyanghbinhlu, Byasaecij Gunghyenz, Sanhleiz Diegrum Gvangjangz, Gamjcuengh Dadau daengj ndaem faex va seiz, dawz yenzsu Bouxcuengh lumj Man, duzdwngz Bouxcuengh, aendomq daengj cang haeujbae.

Yawjnaek swnghdai binjvei, dajcaux binjbaiz daegsaek Boux-cuengh. Aen yienh neix dingh le aen muzbyauh laebguh aen singz ndeiyouq miz daegsaek mbanj Bouxcuengh, ciuq aen lohnaemj cienzbouh ndaem faex rum hwnj

gveihmoz, ciennieb ndaem faex va hwnj suiyingz, dieg faex rum gensez ok cinghbinj haenx, cungdenj dajcaux Baeuqroxdoh vwnzva daegsaek binj-baiz. Roengz 1100 fanh maenz gaijguh Baeuqroxdoh Vwnzva Gvangjangz, Baeuqroxdoh Vwnzva ndaej supsou haeuj ndaw gaijguh hengzdoengh bae, neix ndaej vunz ndawsingz haenx ndei. Linghvaih, aen yienh neix lij aeu faexmakgai, faexmakgaivaiz daengj gij faex miz daegsaek Bouxcuengh haenx ndaem coq henz loh, guhbaenz yienghsienq sam nyied va rim ndoeng, loeg nyied mak rim faex. (Vangz Lenzyangh)

SIUSIK DINJ

简讯

● Vih hawj aen mbanj diemj fuzbinz doenghboux dajciengx daez-sang gisuz dajciengx, 8 nyied 7 hauh banhaet, Bingzgoj Yen Minzcuzgiz youq Gojva Cin Bahlungz Cunh Mbanjgancung gawjbanh mouseng, yienzbya, cwznoh daengj dajciengx beizyibanh, ndaw mbanj neix gungh miz 39 boux ciennieb dajciengx camgya beizyin. Neix hawj doenghboux dajciengx hagaau gaemmaenh gij gisuz moq dajciengx doihduz, cekgej dajciengx nanzdaez.

(Cangh Goh)

● 8 nyied 7 hauh, Nazboh Yen Minzcuzgiz cujcz canghyw fuzvudui daengz Lungzhoz Yangh aen mbanj Yauzcuz comzyouq haenx—Mbanj-yungz gaihcanj yivu yawjbingh ywbingh hozdung. Ciuq gyoepsuenq, hozdung ngoenzhaenx gungh fat senhconz swlhliu 300 lai faenh, ciep vunz genjcaz 100 vunzbaez, vunz caz gengangh 200 vunzbaez, hawj vunz ywbingh 80 lai vunzbaez, fat yw 100 lai hab, gij yw neix dij 1000 lai maenz.

(Vangz Bizvaz)

● 8 nyied 8 hauh banhaemh, Yizcouh Si youq Lozdungh Yangh Mbanjvuzcunh vwnzva hozdung cungsim gawjbanh Yizcouh Si Dungjyiz Cansen fuzvu lajmbanj nungjyez gisuz daih' it geiz beiz-yinbanh. Ciuq gyoepsuenq, haemh haenx daihgaig miz 80 vunz camgya dajndaem gosangh ciengx nonsei beizyin, fat swlhliu 300 lai faenh.

(Vangz Ging Veiz Mungzvaz)

● 8 nyied 9 hauh, Sanhgyangh Dungcuz Swciyen "cien mbanj fanh hoh vwnzyi hawj vunzlai souh' ik gunghcwngz" youq ndaw yienh Linzhieh Yangh Gvandung Cunh haidoengh lo. Coglaeng, aen yienh neix yaek dawz dinghseiz "soengq" vwnzva bienqbaenz "dajndaem" vwnzva, youq lajmbanj beizyangj aen vwnzyidui ciengxlwenx youq haenx.

(Gungh Bujganh)

● Vih swnjcienz henhoh Heiq-cuengh Baihbaek cungj guekgya gaep feihvuzciz vwnzva yizcanj neix, Denzlinz Yen yawjnaek genjok lwgnyez beizyangj baenz vunzcaiz Heiqcuengh. Daj 7 nyied 15 hauh daengz 8 nyied 10 hauh, aen yienh neix youq ndaw yienh vwnzva' gvanj gawjbanh lwgnyez diuq foux Heiq-cuengh beizyibanh, gungh miz 26 boux lwgnyez maenhndei camgya beizyibanh.

(Banh Sauginh)

Dayozswng Haeuj Yungzsuij Mbanjyauzcuz Bae Banghag



大学生深入 融水瑶寨支教

8 nyied 10 hauh, 9 boux dayozswng daj Gvangjsih Swfhfan Dayoz, Gvangjsih Yisuz Yozyen, Anhyangz Swfhfan Yozyen daengj gauhyau daeuj haenx gyoebbaenz aen doih bangcoengh gyauiyuz haenx daengz Yungzsuij Myauzcuz Swciyen Bwzyinz Yangh Linzcwnz Cunh Mbanjyauzcuz Linzcwnz guh bangcoengh gyauiyuz hozdung, soengq daehsaw, habvwnzgi, yenzbiz, siengbiz caeuq sihgah daengj doenghyiengh hawj gyoengq lwgnyez Yauzcuz, faen cuj haeuj ranz bae coengh hagseng hagsaw, cujcz hagseng vehdoz, lienh suhfaz, aeu neix comz ndaej sevei gingniemh, hoizbauq sevei. Ndaw doz dwg gyoengh dayozswng cingq fat doenghyiengh hawj gyoengqnyez Yauzcuz.

(Liu Swjyenh ingj)

Hocouh: Haeuj Mbanj Gungzhoj Saujsu Minzcuz Bae Fuzbinz

贺州:深入少数民族贫困村实施扶贫工程

Gaenh bi daeuj, Hocouh Si Bingzgei Gvanlij Gih aeu seiq hangh cosih, haeuj mbanj gungzhoj saujsu minzcuz saedhengz fuzbinz gunghcwngz, hawj haujlai saujsu minzcuz ndaej duet "mauh gungzhoj", byaij hwnj roen baenzfouq.

It dwg fuzbinz sien "bang daezsang suciz". Aen gih neix gonqlaeng youq Sahdenz, Ngozdangz Cin hai siujyoz minzcuzbanh, bangcoengh saujsu minzcuz hagseng swnhleih guhsat yivu gyauiyuz, mboujduenh daezsang saujsu minzcuz vwnzva suciz. Linghvaih, aen gih neix daihlig gyagiengz gak cungj saedyungh gisuz beizyin, mboujduenh

daezsang saujsu minzcuz vwnzva suciz, demgiengz baenzfouq naengzlig.

Ngeih dwg sien guh roen. Gaenh bi daeuj, aen gih neix doenggvaq lai cungj fuengsik roengz 1200 lai fanh maenz coihguh 18 diuz 58 goengleix roen mbanj, 6689 boux ginzcong saujsu minzcuz souh'ik, hawj dieg Yauzcuz haidoeng le roen baenzfouq, roen vuenyungz.

Sam dwg aeu canjyez daiq-doengh ginghci. Gaenh bi daeuj, aen gih neix ciuq dieg anbaiz, gohyoz gveihva, daihlig saedhengz canjyez fuzbinz gunghcwngz. Bineix, aen gih neix gungh fat daigvanj diep leihsik fuzbinz daengz ranz haenx 101 fanh

maenz, bangfuz 380 hoh nungzminz gungzhoj fazcanj ginghci laj faex.

Seiq dwg "minzsingh gunghcwngz" hawj vunz ndang raeuj. Daj 2008 nienz daeuj, aen gih neix gungh youq mbanj gungzhoj saujsu minzcuz gaij ranzhaz 130 aen, gaijgez 520 vunz ranzyouq nanzdaez; coihguh 23 giz vunz caeuq doihduz gwnraemx gunghcwngz, gaijgez 4973 vunz gwnraemx vwndiz; caiq guh 2000 lai aen daemzcaujgi, hawj yienghsienq mbanj saujsu minzcuz bienq ndei bienq moq, gij swnghhoz ginzcong saujsu minzcuz haenx cizlieng ndaej daezsang.

(Vangz Ligenh)